

Date – 22/02/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma chuan Thenzawl naupang pathum tuia tlahlum te chu a tawrh pui thu a sawi.
2. Excise Minister Pu Lalngthinglova Hmar chuan nimin khan a bial Aizawl West-II chhung Vaivakawn huam chhunga hmasawna hna thawh tur a tlawh.
3. ZPM Thalai General Headquarters President Pu Jeje Lalpekhua chuan NH-6, Sairang leh Buichali inkar kawng thawmthat hna chu a hmunah kalin a tlawh.
4. Women's Cricket, Australia-a Adelaide Oval Stadium a khelh, T20I-ah India chuan run 17-in Australia an hneh.

<><><>

CM CONDOLENCE

Chief Minister Pu Lalduhoma chuan Thenzawl naupang pathum tuia tlahlum te chu a tawrh pui thu a sawi.

Nimin khan Thenzawl naupang pathum - H. Lalhruiatluanga (kum 9); Lalmuansanga (kum 9) leh C. Lalbiakhluna (kum 7) te chu Dil-ah an tla a. Naupang pathum te hi nimin tukthuan ei kham atang khan an thian ho hian an inkawm a. Zanriah ei hunah pawh an la haw loh avangin an chhhung ten an zawng a, Dil-ah tuicheng tura an kal thu an thian kawm pakhat hnen atanga an hriat atangin mitlawmngai ten an kalna nia an rin khua atanga hnai te, Cooperative Society te Dil ni thin Society Dil tia sawi thin chu an pan nghal a. Dil ko tlangah an chapal hmuh niin Dil chhung dap a nih hnuah an ruang tlai dar 5:30 leh dar 6:00 inkar vel khan hmuh a ni ta a ni.

Chief Minister Pu Lalduhoma chuan social media kaltlanga tuarhpuina thu sawiin, a bial chhung Thenzawl Vengthar naupang duhawm tak tak pathumte chu Society Dilah chesualin an nunna hlu tak an chan tih a hriat chuan hrehawm a tiin paw a ti hle a, an kalsan tak an chhungkua leh he thihnain a nghawng zawng zawngte hnenah Pathian thlamuanna lo thleng mawlh rawh se a ti a ni.

An ruang te hi Thenzawl Vengthar YMA President Pu H. Liansanga Inah dah lai lawk an nih hnu in an chenna in theuh panpui an ni a, nizan khan a rualin Thenzawl Vengthara Bengkhuaia Hall-ah lumen niin, vawiin hian an chenna In theuhah vui an ni ang.

<><><>

MLA VISITS

Excise Minister Pu Lalngthinglova Hmar chuan nimin khan a bial Aizawl West-II chhung Vaivakawn huam chhunga hmasawna hna thawh tur, Vaivakawn Zohnuai atanga Rangvamual kalna tur kawng chu a hmunah enin hmalak dan tur sawi ho nghal a ni.

Vaivaikawn Zohnuai leh Rangvamual inkalpawhna tur kawng siamna tur hian Special Assistance to State for Capital Investment (SASCI) hnuaiah cheng vaibelchhe 5.7 dah a ni a. Nikum 2025 December ni 20 khan thu neituten enfiah tawhin, chumi tuma rel angin PWD in kawng kal dan tur Preliminary Survey an nei tawh a, km 1.4 bawr vela thui tura ngaih a ni.

Minister Pu Lalnghinglova Hmar chuan, ‘Aizawl khawpui thang chho zelah, Sairang lam atanga Vaivakawn a lirthei lo lut traffic jam nasa thin lutuk tih ziaawm a tul hle a ti a. Tuna kawng ruahman hi a hlawhtlin theih chuan Vaivakawn, Luangmual leh Aizawl tlak lam veng zawng zawng tan a tangkai hle dawn a ni’ a ti.

He hunah hian PWD official te bakah Vaivakawn leh Luangmual Local Council leh khawtlang hruaitute an tel.

<><><>

ZPM YOUTH

ZPM Thalai General Headquarters President Pu Jeje Lalpekhua chuan NH-6, Sairang leh Buichali inkar kawng thawmthat hna chu a hmunah kalin a tlawh.

MLA Pu Jeje Lalpekhua chuan Kawng siam mek chu ZPM Thalai chuan an vil reng dawn tih a sawi a, fur ruahtui tlak hma a siam zawh ngei a nih theih nan hma chak tak a la turin Company hotute a hrilh bawk a ni. Mizoram mipuite tan a kawng pawimawh tak an khawih avangin tha takin, mipuite duhthusam ang ngei a siam turin kawng siam tute a hrilh bawk.

Ministry of Transport & Highway hnuaia awm National Highways 6 enkawltu National Highways & Infrastructure Development (NHIDCL) leh an hnuaia thawk BALAJI, BR Goyal leh J. Infratech Private Limited (JANDU) te an ni a, Sairang to Buichali Kawng khawihtu J. Infratech Pvt Ltd (JANDU) te nen an hmalakna te kan en ho a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PANDIT DEENDAYAL PRASHIKSHAN ABHIYAN

BJP National Spokesperson Pu Guru Prakash chuan an party chuan duhsak bik an nei lo a, India ram pum chu chhungkua angin an en tih a sawi.

Nimin khan BJP Mizoram State Office Mipui Run, Upper Republic ah nikhat awh Prashikshan Abhiyan Training hman niin, he huna thu sawitu Pu Guru Prakash chuan, Pu Modi Sawrkar chuan India ram chu Global AI Hub-ah siam a tum mek tih a sawi a, Khawvel hmasawna kal zelah IT lam thiamna a pawimawh chho zel dawn a, chutiang chiah chuan BJP mi leh sa te chu IT lama thiamna an neih theuh theih nan Deendayal Upadhyaya Prashikshan Abhiyan pawh hi buatsaih a ni, a ti.

Prashikshan Abhiyan Training hun an hman hi BJP State General Secretary Pu Lalfakzuala Hauzel in a kaihruaia, State President Dr K Beichhua'n kal khawmte lawmna thu a sawi bawk a ni.

<><><>

CONFERENCE PREPERATION

KTP General Conference Saitual a hman turah inbuatsaihna ngawrh takin kalpui zel a ni a, tunah hian hnathawh tur zualpui thawh zawh tawh niin khawtlang mipuite pawh mikhual thleng turin an inpeih tawh.

Pandal hi kum danga la tih ngai loh angin Mark Advertising in an sa a, thutna hi mi 15,000 vel leng thei tura ruahman niin Pandal hi adung feet 250, a vang feet 180 a zau niin, a chheh vel hmun engemaw zat chu inkhawm chhim theih tura ruahman a ni.

Hnatlang hi nimin thleng khan vawi 28 koh tawh a ni a, chhiar hleih theih loh sub committe peng hrang hrang hnatlang chhun leh zanah a awm reng bawk. Hnatlangah hian tualchhung mite bakah khaw thenawmte an thawk chhuak thin a, tha bakah sum fai tanpuina engemawzat khaw thenawm leh Kohhran hrang hrang atanga an dawn avangte, Chaltlang Branch in Inkhawmpui stage banner a thlawn liau liauva an siam sak avangin inkhawmpui thlengtute chuan lawmthu an sawi a ni.

<><><>

MANN KI BAAT

Prime Minister Narendra Modi-a'n vawiin chawhma dar 11-ah Mann Ki Baat hun, Akashvani-ah a hmang leh dawn a, radio-a he hun a hman vawi 131-na tur a ni. Prime Minister thusawi hi Akashvani leh Doordarshan network zawng zawng bakah AIR News website-ah leh Newsonair mobile app-ah te tihchhuah a ni ang a, AIR New, DD News, PMO leh Ministry of Information & Broadcasting Youtube channel-ah te, live-a pek chhuah a ni bawk ang a. Prime Minister thusawi, Mizo tawnga lehlin tihchhuah zui a ni ang.

<><><>

Women's Cricket Team

Women's Cricket, Australia-a Adelaide Oval Stadium a khelh, T20I-ah India chu run 17-in Australia an hneh. India chuan series thum khelhah 2- 1 in an chak a ni. India-in run 177 alo neih tawh chu umzuiin Australia hian run 159 an siam thei a, wicket 9 an hloh thunga. Shreyanka Patil leh Shree Charani te'n wicket thum ve ve an lak lain Arundhati Reddy chuan vawi hnih a la a, Renuka Singh Thakur chuan wicket khat a la bawk. Hemi hma hian bat hmasa ber thlangin India hian run 176 an lo nei a ni.

<><><>